

# Efesios

---

**Pablo ishim Porrosht aabo ör saludo.**

**1** <sup>1</sup>Yok Pablo. Porrosht chihla yok par yok Jesucristo ir apóstol. Tichew ana hutita par tokosim olak uje olak Porrosht aabo uje ye otiislo eyok Irhích Jesucristope, uje olak dechi dit Efeso. <sup>2</sup>Sehe tuu eyok Deych Porrosht hn eyok Irhích Jesucristo odosir olak hn oduhu olak aho kiis.

**Porrosht shiyokör kuche om par daabo.**

<sup>3</sup>Pishibo watsaklo, oyeeychāha eyok Deych Porrosht, uu eyok Irhích Jesucristo ir Deych. Wichí uje sosir eyok pork ye yotiis Cristope. Sosir eyok uje nos ishim eyok erze kuche om uje tāra ire. <sup>4</sup>Uje ehn yahpaa Porrosht niyokör nāhu irmökite ichii chihla eyok par uje ye yotiis eyok Irhích Jesucristope heke eyok ir aabo. Ele ahle nīhyok ye eyok hñitew chihí Porrosht ahirpe heke ye latik pwele tatehe Porrosht ile ikich uje eyok hñitew dechi. <sup>5</sup>Porrosht ich sahmūr pishí eyok. Uje ehn yahpaa niyokör nāhu irmökite ichii chibíte uje eyok tyenij yomsaha par ir aabo pork Jesucristo tyenij ishi eyok hñitewíhi Porrosht ahir. Porrosht chibítkite shuu itsorz shí pork wichí sahmūr shiyokör shuu itsorz. <sup>6</sup>Heke nos yeeychāhalo Porrosht pork shuu yomsaha par eyok ir aaboni. Nīhyok ye duhu bahatikish uje sosir eyoklo pork ye yotiis ir Ijítpe uje ich sahmūrpa. <sup>7</sup>Shi Cristo wichí uje tooho eyok hn ir armista noshihi krus eeych par uje ishi eyok hñitewíhi Porrosht ahir. Heke Porrosht perdonar eyok erze kuche mihnūwo uje yiyokörlo shí pork sahmūr sosir eyok. <sup>8</sup>Porrosht sosir pishí eyok, <sup>9</sup>pork shuu eyok eykdeyo hn shuu yiraha uje ire sahmūr, hn shuu yiraha uje Cristo tirētni par ishi eyok hñitewíhi Porrosht ahir. Shi tyenij ye yotiis ire par uje yomsaha par eyok ir aabo, per erze yewo ye odirehepe uje Porrosht shiyoköríhi eyokloni. <sup>10</sup>Uje teríhi ese ishirít nehe ich Porrosht nos nishii kuche uje de poörç hn uje de hñimich par uje Cristo masaha par ör bahluwa hn nos tibey ör. <sup>11</sup>Porrosht chihla eyok wapkite pork chiraha uje deeych yet nehe hn ye yotiis Cristo heke nos shuu tokole shí itso uje ire chibíte wapkite <sup>12</sup>par

uje òryok webich oso uje ye oyotiis Cristope ich Porrosht ishimihì òryok ikirìt shi par uje oyeeychāha ire hn oyuhu ire dich. <sup>13</sup> Olak itspo, entloni erze ahwoso uje ich ūru uje Cristo ishi olak hnitewihì Porrosht ahirkite, hn ye otislo Cristope, heke Porrosht ishim olak Dechibich uje chibite wapkite par uje ishim eyok. Ese Porrosht Ichibich uje de eyok aho wichi yarta <sup>14</sup> uje shuu imeheeych uje eyok owich dechi Porrosht ahir. Deech yet nehe uje yaachihilo wahacha Porrosht ahir ich yomsaha eyok owich, heke shish yeeychāhalo ire hn yuhu ire dich.

**Pablo shish orar sapur Porrosht par uje shuu òr eykdeyo.**

<sup>15</sup> Pishibo watsaklo, tukunt uje olak ye otislo eyok Irhìch Jesuspe hn tukunt uje ahmūrlo erze Porrosht aabo yewo toy, <sup>16</sup> heke shish tikinship Porrosht par olak, hn shish yok orar tapur Porrosht par olak. <sup>17</sup> Shish tapur eyok Irhìch Jesucristo ir Porrosht. Wichi uu ir Deych. Sehe tuu duhu olak eykdeyo hn duhu ma erahalo pishi ire. Ich om uje oso oshuu Porrosht dich. <sup>18</sup> Shish tapur Porrosht par uje sehe tuu duhu ma erahalo ir iluu. Sehe tuu erahalo uje Porrosht chiihla olak par ishim olak kuche uje ich om nehe. Wir ich ihirt pisho erze uje yesh Porrosht tibey par ishim daabo nehe. <sup>19</sup> Hn shish tapur Porrosht par uje sehe tuu duhu erahalo lakirbo uje ich deyo. Nihyok ye uhurztikish. Chira erze lakirbo uje sosir eyok uje eyok ir aabo. <sup>20</sup> Chira erze lakirbo uje shuu Cristo ikponi hn tokolihi erze topo òr ahir hn shuu sakaha naächta pork wichi ich dich toy. <sup>21</sup> Porrosht shuu Cristo ma dich je nos wir erze uje òr ukurbo de ele ahle hn uje de nehe. <sup>22</sup> Porrosht nos chibite erze kuche Cristo ir hnite uut pork nos serz heke nos de ir hme hn chibite toy uje Cristo wichi bahlut uje nos tibey Porrosht aabo shi itso uje ire òr huta, <sup>23</sup> hn Porrosht aabo wir shi òr itso Cristo yuhurza. Cristo nos de irmo lekityo hn poorc.

**Eyok Porrosht aabo shi pork sahmūr eyok.**

**2** <sup>1</sup> Titim olak. Wap shi olak itso topo pork ye erahalo Porroshtpe. Shi tyenij etirlo urhuta bahluta ehete nehe pork shish ahakörlo uje ich mihñüwo heke olak hnitew de Porrosht ahir. <sup>2</sup> Shi olak itso erze oso yewo uje ode nāhu irmo uje shish oshiyokör uje ich mihñüwo. Shish olak de Satanás ir hme uje dechi poorc pehet hn shuu oso oshiyokör uje ire sahmūr, erze uje ye oniyokörpe uje Porrosht sahmūr. <sup>3</sup> Antni nos yiyokör shi itso òr ire. Shish yiyokör erze kuche mihñüwo uje yahmūr. Yuhu eyok eyuwo tisirn par uje yiyokör. Uje eyok shürha ichii itsorz heke Porrosht tyenij sepyër eyok. Shi eyok itso erze oso yewo uje ode nāhu irmo, <sup>4</sup> per Porrosht chuuna uje eyok losuhlaabo hn sahmūrpa eyok <sup>5</sup> heke uje ehn yiyokör uje ich mihñüwo uje tyenij shuu Porrosht sepyër eyok nehe ichii ye yotiis Cristope heke Porrosht ishim eyok ese ikirìt uje de ire ahir. Shi ishimihì eyok pork sahmūr eyok. <sup>6</sup> Porrosht tyenij shuu eyok ikpo

nehe shuu itso uje shuu Cristo ikponi hn tyenij shuu yiyakaha Cristo ahir wahacha poõrc nehe, 7par uje shuu yiraha nehe uje ire ich sahmūr pishi eyok shi pork ye yotiis Jesucristope. 8Porrosht sahmūr pishi olak toy heke ishim olak ese owich uje de ire ahir shi pork ye otiislo irpe. Ye olak pwele uje ahakõrlo kuche par uje uhulo Porrosht ishim olak ese ikirīt. 9Shi Porrosht wichi uje ishimihī olak heke nīhyok yeēk uje narim irehe wahacha poõrc shuu itsorz. 10Shi Porrosht shiyokōr eyok shuu eyok kināho shi pork ye yotiis Jesucristope par uje yiyokōrlo erze uje ich om uje Porrosht chībīte wapkite par uje shish yiyokōrlo.

### Cristo shuu eyok aho kiisihīye.

11Olak uje ye olak israel osope ye ekeylo uje olak dihipo kināho. Erze israel oso otata uje olak kināho pork nīhyok ye olak yarta chihīpe waa je iich otsiī sirkunsisyon. Erze uje ōr yarta de wir israel oso. Ochibite ōr asa yarta pork Porrosht chiihla ōr per shi hnakirbo wir uje ochibite duhu hnakirbo ōr yarta. 12Ye ekeylo uje antni ye erahalo Cristope, hn ye meylo erze israel osope heke erze ahwoso uje Porrosht chībītkite wir ye par olakpe, shi par israel oso. Olak uje olak de nāhu īrmo ye anemlo Porroshtpe par uje etīrlo ahir nehe, hn ye eeychāhalo Porroshtpe. Shi eeychāhalo porrosht kināho. 13Antni olak dukuhlehe Porrosht per ele ahle ich ye olak dukuhlehepe shi pork ye otiislo uje Jesucristo tooho krus eeych hn ir armista noshi. Wichi uje ishi olak hnitewihī Porrosht ahir heke olak owich de ire ahir. 14Cristo wichi uje nos shuu eyok aho kiisihīye pork shuu itso erze israel oso hn erze dihipo kināho uje ode lekityo. Wir otsitakye shi itso uje moraylt de ōr ehēt per ire shuu ōr aho kiisihīye heke chiyuhu ese uje itso moraylt. 15Uje Cristo tooho krus eeychkite ich chībīte uje asa ley waa je Moisés chichewkite ich ye jukur. Antni israel oso wir ōr weeta nohmira hn nos wir dihipo kināho wir ōr weeta kinaha. Cristo nos shuu otakasho lawich par uje shi ōr weeta nohmira de, shi erze uje ye olotiis irpe. Heke shuu erze israel oso hn erze dihipo kināho ōr aho kiisihīye. 16Uje Cristo tooho krus eeychkite ich nos ishi eyok hnitewihī Porrosht ahir. Cristo shuu ōr weeta nohmira erze dihipo kināho hn erze israel oso par uje ye oditakyepe. 17Cristo taāchkite par ishi eyok hnitewihī Porrosht ahir hn shuu oyanimīrāha lahwoso oyitīm olak uje olak dukuhlehe Porrosht hn oyitīm erze israel oso uje ye odukuhlehepe par uje oyuhu erze israel oso hn erze dihipo kināho ōr aho kiisihīye hn oyuhu ōr aho kiisihī Porrosht toy. 18Olak uje olak dukuhlehe Porroshtni hn ōryok uje ye ōryok dukuhlehe Porroshtpe ele ahle ich eyok ye yotiis Cristope heke Porrosht Ichībich nohmira de eyok aho. Wichi takashīm eyok uje eyok orar yapur Porrosht ich shi itso uje yitīr ire. 19Heke olak ich ye olak ilo erze dihipo kināhope uje shi otīr hnimich yet otekirihī hn deeych yet ich ocheeshpo. Ele ahle ich olak kināho pork olak

owich de Porrosht ahir pork olak ir iiso itso erze ir iiso yewo pork ich olak Porrosht aabo. <sup>20</sup>Shi òryok itso puertit uje oshiyokòr pork ye oyotiis erze apóstole hn erze profeta poruwo wishi òr ahwospe heke wir òr itso uhwirbe uje ochihìtsim hn shi òryok itso puertit ujuwo. Jesucristo wichi itso ese kutich <sup>21</sup>uje sontew ese puertit par uje ye kaype. Heke shi òryok Porrosht ir templo uje yesh oshiyokòr. <sup>22</sup>Olak owich de toy ese Porrosht ihyuch pork Porrosht fchibich de eyok aho.

**Pablo sanimirāha Porrosht ahwoso tatim dihipo kināho.**

**3** <sup>1</sup>Yok Pablo. Yok de karsel eheth shi pork tanimirāha Jesucristo ir ahwosni uje ire tooho krus eeych hn ishi òr hñitewihi Porrosht ahir hn titim olak uje olak dihipo kināho, heke oshiyeru yok. Par yok ich shi Jesucristo wichi uje shiyeru yok, ye osope. <sup>2</sup>Tibite uje ich erahalo uje Porrosht ishim yok ahnūwo pibiyo uje ich ihirt pisho par uje tiyokorāha olak. <sup>3</sup>Porrosht tatim yok lahwoso par uje tiyokorāha oso. Tichew tibite ana hutita eheth tuu ahwoso arhaabo. Antni ye oso odirehepe erze uje Porrosht tatim yok. <sup>4</sup>Uje olak ler ana hutita ich erahalo erze uje Porrosht tatim yokni, erze uje Cristo shiyokòr par eyoklo. <sup>5</sup>Porrosht ye tatim òryok poruwo wishi petikni hnii olak poruwo wishi par uje ochiraha, per ele ahle shuu Dechibich tatim erze ir apóstole hn profeta. <sup>6</sup>Porrosht tatim yok shuu itsorz. Erze uje ye òr israel osope kimiji ye olotiis Jesucristo ich òr owich de Porrosht ahir shi òr itso erze israel oso. Erze ahwoso uje Porrosht chibite par israel oso wir par erze dihipo kināho toy. Erze israel oso hn erze dihipo kināho wir òr weeta nohmira shi pork ye olotiis uje Cristo ishi òr hñitewihi Porrosht ahirkite, heke ich òr owich de Porrosht ahir. <sup>7</sup>Ele ahle ich Porrosht ishim yok erze obiyo shi pork sahmūr shuu tanimirāha titim oso uje Jesucristo ishi òr hñitewihi Porrosht ahirkite hn wichi takashim yok chira dakirbo. <sup>8</sup>Erze Porrosht aabo wir ma òr iluu om je yok pork antni tiyokòr mihnikihi òr, per Porrosht ishim yok erze obiyo par uje tanimirāha ir ahwoso titim erze dihipo kināho uje Cristo ishi òr hñitewihi Porrosht ahir. Erze uje Cristo shiyokòr par eyok ich nihyok ye latik pwele chibite ir bahat pork ich dichpa. <sup>9</sup>Sehe nos titim oso erze uje Porrosht shiyokòr par eyok, erze uje òryok poruwo wishi ye odirehepe hnii olak poruwo wishi ye odirehepe. Porrosht wichi uje nos shiyokòr erze kuche uje de. <sup>10</sup>Porrosht chibite uje ir aabo oshuu imeheeych uje ire ukurbo deyo de hn eykdeyo heke erze uje ode poòrc omo òr hn ochiraha toy. <sup>11</sup>Uje ehn yahpaa Porrosht niyokòr nāhu irmokite ichii chibite uje tyenij tokole itsorz heke eyok Irhich Jesucristo shuu tokole itsorz. <sup>12</sup>Ele ahle uje nos eyok orar ich eyok dechi Porrosht ile ikich. Ye yipookpe pork ye yotiis Jesucristope. <sup>13</sup>Uje yok de lika karsel eheth shi pork tanimirāha erze ahwoso oomo titim olakni ich ye uhu olak dosdarakihii yok pork erze uje t̄ir yok ich narim olak.

**Cristo sahmūr pishi Porrosht aabo.**

<sup>14</sup>Porrosht shiyokōr kuchit uje ich ihīrtpa par eyok heke ich shuu tokotsa pite hnimichīhi eyok Deych Porrosht ile ikich. <sup>15</sup>Nos wir Porrosht aabo uje ode poōrc hn uje ode lika hnimich ich nos ōr iiyo tāra uu ōr Deych Porrosht. <sup>16</sup>Yok orar tapur Porrosht par uje shuu Dechibich uje de olak aho ishim olak ukurbo uje tāra Porrosht. Ir ukurbo ich deyo. <sup>17</sup>Sehe tuu Cristo debuhu olak aho shi pork ye otiislo irpe heke ahmūrlopa Jesucristo hn ye olak koswāha irpe. <sup>18</sup>Heke olak pwele erahalo uje Cristo sahmūr pishi olak itso erze Porrosht aabo yewo ochiraha uje Jesucristo sahmūr pishi ōr. Wichī ich ye uhurtikish uje sahmūr ōr, shi itso uje ich ehēt dich hn shi itso uje berzakpa hn shi itso uje porit hn shi itso uje ich yaka. <sup>19</sup>Sehe tuu erahalo uje Cristo sahmūr pishi olak shuu itsorz. Nīhyok yeēk pwele tiskēr pork ich ye uhurtikish uje sahmūr olak. Uje erahalo ire itsorz ich olak iluu itso uu Porrosht ir iluu. <sup>20</sup>Porrosht ir ukurbo de eyok aho par uje nishii eyok iluu. Chīra lakirbo uje de eyok aho ich ire pwele shiyokōr shuu iyuwe erze uje yapur ire hn shuu iyuwe toy erze uje yuhu eyok eyuwo tisīr. <sup>21</sup>Sehe tuu nos wir Porrosht aabo shish oduhu Porrosht ich dich. Wir uje ye olotiis Jesucristope. Uje oniyokōr oduhu ilorz ich ihīrtpa.

**Porrosht Ichibich shuu Porrosht aabo ōr eyuwo itsye.**

**4** <sup>1</sup>Yok de karsel ehēt shi pork tiyokōr eyok Irhīch ir ibiyo. Porrosht chiihla olak par olak ir aabo heke shish tyenij ahakōrlo uje ich om pork ye ompe erze uje Porrosht chiihla ōr oshiyokōr uje ich mihnūwo. <sup>2</sup>Ye olak narim olak, hn ye uhu olak iljaabo. Tyenij enthilo pishi olak leshibo, hn tyenij olak ewenta ōr hn ahmūrloye pork <sup>3</sup>Porrosht Ichibich sehe duhu olak aho kiisīhiye. Enaha olak par uje ye ontilo Porrosht Ichibich. Akashilo olak eyuwo par uje ye etakloye uhulo olak kara. <sup>4</sup>Porrosht ir aabo shi ōr weeta sohmira. Porrosht Ichibich de ōr aho. Wichī shi sohmira. Uje omasaha par Porrosht aabo, ich shuu ochiraha uje ōr owich de Porrosht ahir. Nīhyok ye owich kinehētikish. <sup>5</sup>Eyok Irhīch shi sohmira. Shi tyenij ye yotiis ire, nīhyok ye iluu kinaharāsh uje shuu yomsaha par Porrosht aabo. Otohirm oso shi par shuu imeheeych uje wir Porrosht aabo pork ye olotiis Cristope. Nīhyok ye iluu kinaharāsh par uje otohirm ōr. <sup>6</sup>Shi Porrosht sohmira de, wichī uu nos eyok Deych hn uu eyok bahlut pisht. Wichī uje shuu nos oshiyokōr debiyo, hn Porrosht Ichibich de eyok aho.

<sup>7</sup>Per Cristo nos ishim eyok kal nohmira lakirbo par uje yakashimloye. Cristo ishim eyok uje ire sahmūr, <sup>8</sup>pork Porrosht ahwoso tata shuu itsorz im: —Uje terihi ishīrit uje Cristo hno tīr poōrc ich hnoy erze oso ich okihniya uje ode ese owich uje ye ōr pwele otokolpe seya ōr poōrc hn

ishim yewo lakirbo uje ode lika ĩrmo par otakashimye.— 9 ¿Duhu inaapo uje tata uje hno tĩr poõrc? Shuu imeheeych uje tyenij ihmimich wap, hn hno tĩr uje topo õr ichibiyo ode ese owich uje de hnimich uut pisht. 10 Ese Cristo uje ihmimichni shiyehe wichi ire uje ich hno tĩr ma porit par uje nos tibey lekityo. 11 Heke Cristo ishim lakirbo kal nohmira par uje omasaha par apõstole, hn yewo omasaha par profeta, hn yewo omasaha par odirkii ir ahwoso otsanimirãha oshuu oso omasaha par Porrosht aabo, hn yewo par õr bahuwo par otibey Porrosht aabo, hn yewo par uje oshiyokorãha Porrosht aabo. 12 Heke Cristo ishim erze Porrosht aabo lakirbo par uje oshiyokõr ir ibiyo, hn par uje ma shuu õr iluu om 13 nehech terĩhi uhurc nehe ich nos eyok eyuwo itsye uje ye yotiis Cristope, hn ich nos yirahalopa Porrosht ir Ijit. Uje yomsaha par eyok Porrosht aabo ich shi eyok eyuwo itso pikihnint per uje yiraha eyok eyuwo ich shi eyok itso hnakirbo nehech eyok iluu itso Cristo ir iluu 14 par uje ich ye eyok ilo erze pikihninope uje nos ochibite uje erze oso õr ahwoso ich ũru, heke õya yewo hn deeych yet õya yetpo. Erze oso ochibite ire uje ich õr eykdeyo per shi par uje otsehnyer oso. 15 Ye ompe uje yiyokõrlo yuhu eyok itso õr. Ma om uje shish yiita uje ich ũru hn yahmũrloye. Uje yiita yuhu itsorz ich ma shish eyok iluu itso Cristo ir iluu. Wichi uu Porrosht aabo õr Yinsirc. Cristo wichi uu õr huta 16 hn ir aabo wir õr itso ir yũhurrza. Shi itso uje õr itiso tehıye par uje ochishew obiyo hn nos tokole om pork nos õr ikiyo om, heke nos otakasho lawich hn otsahmũrye heke õr iluu tokole ma om.

#### Porrosht ishim daabo õr iluu ahle.

17 Eyok ĩrhıch sehe duhu titim olak uje ye ahakõrlo uhulo olak ilo erze uje ye odiraha Porroshtpe. Wir shi oshiyokõr erze kuche mihnuwo uje oshuu deyuwo tisır. 18 Shi õr eyuwo itso uje ode dihlelta. Nihyok õr ikirit Porrosht ahır pork ye odiraha irpe. Shi oshuu dehe kata. 19 Ye onuuna Porrosht ahwospe hn otsinãha ire par uje oshiyokõr erze kuche mihnuwo uje ich ma otsahmũr. 20 Cristo ir ahwoso ye duhu ahakõrlope erze kuch mihnuwo uhulo olak ilo õr. 21 Tibite uje erahalo Cristo ir ahwoso pork Cristo shiyokorãha olak, hn Cristo ir ahwoso ich ũru. 22 Olak tyenij moymlo erze olak iluu iler uje antni shi ahakõrlo pork ich ahmũrlo ahakõrlo erze mihnuwo. Wir shuu olak iluu ma mihnu. 23 Ele ahle ich tyenij enshiilo olak eyuwo pork olak iluu ich ahle 24 uhu ilo uje anaha olak ishuwo ahlo pork Porrosht shuu olak iluu ahle shi itso ir iluuta. Ich imeheeych uje olak iluuta ich ahle pork ahakõrlo uje ich om, hn ye ahakõrlope uje ich mihnuwo, 25 heke tyenij moymlo uje athılo olak ukushiı par olak leshıbo. Shish tyenij athılo uje ich ũru pork nos eyok shi itso Cristo ir yũhurrza.

26 Uje aas olak uulo ich ye ahakõrlo uje ich mihnik. Ye ompe uje aas olak uulo nehech uhulo deeych yaka 27 par uje ye asimlo Satanás olak par

uje sehnyēr olak. <sup>28</sup> Porrosht aap uje ich echiki tyenij iim uje tohir. Ich ma om uje tyenij chish obiyo, hn shiyokōr erze obiyo uje ich om par uje pwele serz kuchit hn takashim erze uje losuhlaabo uje kuche nihyokīhi ōr ahir. <sup>29</sup> Ye eyuhulo olak ahwosoho uje ich mihñūwo olak ahwo. Shi tyenij eyuhulo olak ahwoso uje ich om par ōr ire otēr heke akashimlo ōr uhulo itsorz. <sup>30</sup> Ye uhulo Porrosht Ichibich dosdarak. Wichī yarta uje Porrosht chībīte olak aho nehech terīhi ese deeych uje Porrosht hnoy daabo nehe. <sup>31</sup> Moymlo uje uhulo olak ehñito hn atsirāha olak ahwoso olak leshībo, hn ye ompe uje moymihilo olak ehemuro olak aho. Ye etaklo yewo. Moymlo uje aas olak uulo hn ebichlo, hn ye eyuhulo olak ahwoso mihñūwo. Ye eyuhulo olak ahwoso uje ye ompe uje shuu olak yewo opook. Moymlo uje sehe tuklo yewo uhulo dospa. <sup>32</sup> Tyenij akashimloye. Tyenij eenilo uje olak leshībo ōr losuhlaabo, hn olak perdonarye itso Porrosht uje perdonar olak pork Cristo ishi olak hñitewīhi Porrosht ahirkite.

#### Porrosht aabo ōr iluu ahle.

**5** <sup>1</sup> Heke tyenij eētlo olak Deych Porrosht pork olak ir aabo. Ich sahmūr olak. <sup>2</sup> Tyenij shish ahmūrloye uhulo itso Cristo uje sahmūr eyok, heke ishīm ire oso par uje oshuu oshuu toy par uje ishi eyok hñitewīhi Porrosht ahir. Wichī shi itso kuche uje aat ehmuuj uje oshīmīhi Porrosht uje ire sahmūr. <sup>3</sup> Olak uje olak Porrosht aabo ye ompe uje uhu olak eyuwo tisīr erze mihñūwo uje erze hñakīrbo hn timcher oshiyokorīhiye uje ye ohñōyhi pishye ahīrpe. Ye ompe uje uhu olak eyuwo tisīr erze mihñūwo uje timcher oshiyokīhi yēr uje ōhyi yēr ahir, hn hñakīrbo ōr itspo uje oshiyokorīhiye hn ōhyiye ahir, hn uje yeēk sahat loshipit, hn uje yanak shuu loshipit sahat ire. Ye ompe uje pikihñino hn pikihñine oshiyokorīhiye toy oshuu itso ōr. Ye ompe uje ekuturāha olak kuche pork olak Porrosht aabo. <sup>4</sup> Ye ompe uje ekitkērlo timcher hn shi uhu olak eyuwo mihñūwo hn timcher olak itspo ye ompe ekitkērlo hñakīrbo hn uhu olak eyuwo mihñūwo. Ye uhu olak ilo totihlo uje shi ochiyuhu lahwoso uje ye jukur. Ye ompe uje athilo kuche mihñūwo par uhu oso oyana, pork ye ompe uje Porrosht aabo oshuu itsorz. Ma om uje yinship Porrosht. <sup>5</sup> Tyenij erahalo uje ich ūrpa uje ōr owich nihyokīhi Porrosht ahir erze hñakīrbo hn timcher uje oshiyokorīhiye uje ye ohñōyhi pishye ahīrpe, hn erze timcher uje oshiyokorīhi yēr hn ōhyi yēr ahir, hn erze hñakīrbo ōr itspo erze uje oshiyokorīhiye hn ōhyiye ahir, hn erze uje otsahat loshipo, hn erze uje shuu loshipo sahat ire. Erze uje shish ochukutirāha ire kuche wir shi itso uje oteychāha kuche ochii ir porroshtīhi, nīhyok ōr owich Cristo ahir, hnii Porrosht ahir.

<sup>6</sup> Ye ompe uje asimlo olak oso par uje otsehnnyēr olak ochīra lahwoso uje ye ūrpe pork erze mihñūwo uje oshiyokorīhiye hn oshiyokorīhi yēr ich shuu Porrosht sitak pishi ōr, heke tyenij sepyēr ōr ich shuu dospa. Wir

erze uje ye oniyokörpe uje Porrosht sahmür 7heke ich ye meylo ör par uje ye ahakörlo uje ich mihñüwo. <sup>8</sup>Wapni shi olak itso ör pork olak de dihlelta toy, per ele ahle ich ye otiislo eyok İrhîchpe. Erahalo uje ich ũru heke shi olak itso luu uje chihit yewo pork uhulo ochiraha uje ich ũru. Ahakörlo uje ich om pork Porrosht shi itso luu hn olak ir aabo <sup>9</sup>pork erze uje shi itso luu de olak aho heke shuu ahakörlo hn athilo uje ich om, hn shuu ahakörlo hn athilo uje Porrosht sahmür, hn shuu ahakörlo hn athilo uje ich ũru. <sup>10</sup>Enaha olak par uje ma erahalo uje eyok İrhîch sahmür. <sup>11</sup>Erze uje oshiyokör uje ich mihñüwo wir shi ör itso uje ode dihlelta eheth. Ich ye meylo ör par ahakörlo uje ich mihñüwo. Tyenij ebitlo orhōta par uje nos ochiraha erze mihñüwo uje oshiyokör hn otsakis. <sup>12</sup>Erze mihñüwo uje oshiyokör hn otsakis ire ich shuu apooklo uje atimlo ör per shish tyenij ebitlo orhōta. <sup>13</sup>Nos wir erze uje ochibite orhōta ich shi itso uje luu chihit hn shuu nos ochiraha. <sup>14</sup>Heke otatim ese uje ye diraha Porroshtpe otsii:

—Owa uje shi itso uje amo ich erîhi. Atokolihî wir ör ahir erze uje tyenij otîr urhuta bahluta eheth nehe, hn Cristo ir yokört chihit owa shuu eraha uje ich ũru.—

<sup>15</sup>Abeylshîp olak par uje ye ahakörlo uje wir oshiyokör erze uje ye odiraha Porroshtpe. Shî tyenij ahakörlo uje ich om pork erahalo uje Porrosht sahmür. <sup>16</sup>Uhulo nahnye uje ahakörlo om pork daalo ich sahnye hn ich oshiyokör mihñüwo ich kihniya, <sup>17</sup>heke ye ahakörlo uhulo olak ilo erze uje ör totihlo. Shî tyenij enaha olak par uje ma erahalo uje eyok İrhîch sahmür hn ahakörlo uhulo itsorz. <sup>18</sup>Ye ompe uje ehelo yikich nehech sêhi olak pork wichi shuu ahakörlo uje ich mîhnik. Ma om ahakörlo uje Porrosht İchibich sahmür uhulo ilo uje ehelo Porrosht İchibich hn ire shuu ahakörlo uje ich om. <sup>19</sup>Uje ekitkêroye ich ekitkêrlo yeehe Porrosht ahwoso uje iich otsii salmo hn erze imno hn korito. Enaha olak uje eētlo erze par eeychâhalo eyok İrhîch uhulo itsorz. <sup>20</sup>Tyenij shish enilo eyok Deych Porrosht par nos wir kuche hn êrlo eyok İrhîch Jesucristo ir iich. <sup>21</sup>Tyenij akashimloye pork Cristo ich dich hn tyenij atililo ire.

#### **Porrosht aabo shi ör itso Cristo ir irâhta.**

<sup>22</sup>Titim erze timcher uje ör abiyo de ich tyenij oshiyokör uje ör abiyo otatim ör shi itso uje oshiyokör uje eyok İrhîch tatim ör. <sup>23</sup>Kal hnakirbich tyenij tibey nerâhta shi itso Cristo wichi uu Porrosht aabo ör bahlut pork wichi uu ör huta hn ir aabo shi itso ir yühurrza. Wichi uje ishi ör hnitewihî Porrosht ahirkite. <sup>24</sup>Porrosht aabo tyenij oshiyokör uje Cristo tata shi itso erze timcher tyenij nos oshiyokör uje ör abich tatim ör. <sup>25</sup>Olak hnakirbo uje olak irêhte de ich tyenij ahmürlo ör uhulo olak itso Cristo uje sahmür Porrosht aabo, heke ishîm ire osokite par uje oshuu

oshuu toy par tooho òr ire <sup>26</sup>par uje Cristo churhù òr aho hn perdonar òr hn otohirm òr, hn tatim òr uje Porrosht sahmùr uje oshiyokòr. <sup>27</sup>Deeych yet nehe hn hnoy Porrosht aabo shuu odebuhu dahir. Erze Porrosht aabo shi òr itso timcharrza uje sarz ire hn ihìrpa hn ir ihyèt hnoy pork Porrosht aabo òr iluu ich om. Nìhyok mihnúwo òr aho shi itso uje ye òr wàrirish hnii uje òr kako itso uje òr ilaro hnii kuche yewo uje de òr per wir ich shi par Porrosht. Nìhyok ye òr hnitew chihi Porrosht ahirpe. <sup>28</sup>Shi itso uje Cristo sahmùr Porrosht aabo ich hnakirbo tyenij otsahmùr pishi nerèhte oshuu itso òr ire uje otsahmùr ire. Erze uje otsahmùr nerèhte ich otsahmùr ire toy <sup>29</sup>pork nìhyok yeèk uje sitak neyùhurrza pork shiyehe wate ire. Shish shuu taak hn tibey neyùhurrza shi itso Cristo uje tibey Porrosht aabo <sup>30</sup>pork shi eyok itso Cristo yùhurrza. <sup>31</sup>Porrosht ahwoso tata im: —Heke hnakirbich tyenij iim deyeh hn iim data par uje hór neràhta òhiye ahir, hn òr osiyer otokole shi nohmira.— <sup>32</sup>Ahnúwo ahwoso uje titim olak ich ye nos odìrehepe. Kwestpa par uje ochiraha. Erze uje titim olakike shi titeèta uje Cristo sahmùr Porrosht aabo hn tibey òr, <sup>33</sup>per kal olak nohmira tyenij sahmùr neràhta shi itso uje sahmùr ire, hn kal timcharrza tyenij tola labich.

**6** <sup>1</sup>Titim olak uje olak pikihnino hn pikihnine. Tyenij ahakòrlo uje olak deyeh hn olak lata otatim olak pork ahmùrlo eyok ìrhìch. Uje ahakòrlo uhulo itsorz ich om. <sup>2</sup>Atililo olak deyo hn olak lati. Wate Porrosht ìr ley webich otita uje ahwoso oomo ìya par takashim erze uje ye otsowepe <sup>3</sup>pork Porrosht im: —Par uje òr aho kiis hn òr ìkirìt berzakìhi nàhu ìrmo.— <sup>4</sup>Hn titim olak hnakirbo hn timcher uje olak aabo ode. Uje oniyokòr uje mihnik ich hnii epiyerlo òr per ye uhulo sowe hn uhulo ochesdelpa. Ahakoràhalo òr eyok ìrhìch ìr ahwoso. <sup>5</sup>Titim olak uje olak òr yìlo uje olak yinsiro ode nàhu ìrmo ich tyenij atililo òr hn ahakòrlo uje otatim olak, hn ye uhu olak aho yùhirsh. Uje ahakòrlo òr ìbiyo ich ahakòrlo uhulo itso uje ahakòrlo Cristo ìr ìbiyo. <sup>6</sup>Ye ahakòrlo shi uje olak yinsirc teychim olak ich hnii eyuhu olak. Tyenij ahakòrlo ìr ìbiyo shi itso uje ahakòrlo Cristo ìr ìbiyo. Tyenij ahmùrlo ahakòrlo ìr ìbiyo shi itso uje ahmùrlo ahakòrlo uje Porrosht sahmùr. <sup>7</sup>Hn enaha olak uje ahakòrlo ìr ìbiyo shi itso uje ahakòrlo Cristo ìr ìbiyo, ye shi hnakirbo òr ìbiyope. <sup>8</sup>Kimiji olak òr yìlo o kimiji ye olak òr yìlope, shish ahakòrlo uje ich om pork erahalo uje eyok ìrhìch tyenij shuu cheeshpo erze uje ich om ishìm olak shuu itsorz. <sup>9</sup>Titim olak uje olak yìlo ode, ahakòrlo oomìhi òr shi itso uje wir tyenij oshiyokòr oomìhi olak. Ye ey olak apha òr. Erahalo uje wir òr yinsirc de poòrc hn olak itspo, hn wichi ye duhu yet kinàhape hn duhu yet kinaha. Shuu nos òr itsye.

#### Porrosht aabo òr itso ohyerptoso.

<sup>10</sup>Ich terìhi uhurc ahnùwo ahwoso uje tyenij titim olak. Uhu olak ukurbosh èrlo erze ukurbo uje tãra eyok ìrhìch pork wichi ich ìr ukurbo

deyo de. <sup>11</sup>Porrosht ishim olak kuche ich kihniya par uje tibey olak. Tyenij nos anāhalo uhulo itso uje ohyerptosht iyāha fyerit shuu sentii derjorrza par uje abeylo olak par uje ye dyablo nehnyēr olak, <sup>12</sup>pork ye yatsirlo osope. Shi yatsīr erze demonyo uje ōr ukurbo deyo de, hn erze demonyo uje ōr ukurbo arhaabo, hn erze demonyo uje otibey erze oso uje ye odiraha Porroshtpe. Wir shi ōr itso uje ode dihlelta ehēt. Erze demonyo ich okihniya uje ode poōrc pehet, <sup>13</sup>heke tyenij nos anāhalo erze uje Porrosht ishim olak par uje tibey olak shi itso ohyerptosht uje iyāha fyerit shuu sentii derjorrza par uje tibey ire. Ahakōrlo uhulo itsorz hn ese deeych uje kuche mihñūwo uje tāra demonyo tīr olak ich olak pwele ewenta. Uje anāhalo uje Porrosht ishim olak par uje tibey olak ich ye ōr pwele oderz olak hn oshuu olak koswāha Porrosht. <sup>14</sup>Olak pwele ewenta pork ese uje itso ohyerptosht ir ihirosht uje Porrosht ishim olak par uje tibey olak wir Porrosht ahwoso uje ich ūru. Hn uhu olak ilo ohyerptosht uje iyāha fyerit shuu sentii derjorrza par uje tibey ire. Wichī fyerit uje Porrosht siteēta uje olak iluu ich om. <sup>15</sup>Ahakōrlo uhu olak ilo ohyerptosht uje terihī deriho. Erze uje itso ir erihyo uje Porrosht siteēta wichī uje etīrlo lekītiyo par uje animirāhalo atimlo oso uje Jesucristo ishi ōr hñitewihī Porrosht ahīrkite par uje shuu ōr aho kiisihī Porrosht. <sup>16</sup>Ye shi erze uje ohyerptosht tibey irpe. Tōhwa kuchēr̄k uje iich otsiī eskudo par uje sentii ire. Wichī shi itso uje ye otiislo Cristope, heke olak pwele ontīlo erze uje dyablo sehe niyokorīhi olak. Ich yarhak uje ire sehe niyokorīhi olak shi itso opīne uje jwekita de wasit uje serzim chīra olak. <sup>17</sup>Ese uje anāhalo shi itso ohyerptosht ir wolt wichī shi itso uje Jesús ishi olak hñitewihī Porrosht ahīr. Hn aharu olak ihīrrza Porrosht Ichibich ir espada. Wichī Porrosht ahwoso. <sup>18</sup>Shish tyenij olak orar apurlo Porrosht. Apurlo Porrosht par uje shuu Dechibich shiyokorāha olak uje olak orar. Enahalo olak uje olak orar. Uje olak orar uhulo itsorz ich tyenij emīt olak hn ye moymlō uje olak orar. Tyenij olak orar toy apurlo Porrosht par uje nos sosir erze daabo yewo. <sup>19</sup>Titim olak par uje olak orar toy apurlo Porrosht par yok par uje Porrosht dosim yok erze ahwoso uje ich om par uje titim ōr, hn par uje ich ye tikitila ōrpe par uje tuu ochiraha uje Jesús ishi ōr hñitewihī Porrosht ahīrkite pork nos ōr ire ye odirehepe. <sup>20</sup>Porrosht shuu takaha par uje titim oso ir ahwoso, hn shi pork tanimirāha ir ahwoso heke oshiyeru pihmikit ochīra kenena hn ochimchaha yok karsel ehēt. Sehe tuu olak orar apurlo Porrosht par uje yok pwele titim ōr erze ir ahwoso hn ich ye tikitila latik.

### **Pablo ishim Porrosht aabo ōr saludo.**

<sup>21</sup>Titim olak uje Tíquico wichī Porrosht aap toy hn tahmūr pishi ire. Yelij sehi lahwoso. Wichī eyok Irhīch ibik toy. Tyenij nos tatim olak erze kuche uje oshiyokorīhi yok, hn erze pībiyo uje yesh tiyokōr, <sup>22</sup>heke

tuu hno tĩr olak par uje shuu erahalo uje tokolihi õryok hn par uje shuu olak aho kiis. <sup>23</sup>Sehe tuu eyok Deych Porrosht hn eyok Irhĩch Jesucristo oduhu eyok leshibo õr aho kiis hn onahmũrye pork ye olotiis Porroshtpe. <sup>24</sup>Sehe tuu Porrosht dosir nos wir erze uje shish otsahmũr eyok Irhĩch Jesucristo.